

Uunga siunnersuut: KNI A/S pillugu Inatsisartut peqqussutaata allanngortinneqarneranik Inatsisartut inatsisaat

(Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu Allanut Naalakkersuisoq)

Akissuteqaat

(Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu Allanut Naalakkersuisoq)

Pingajussaaneerreqarnera

Naalakkersuisut sinnerlugit Inuussutissarsiornermut Ataatsimiititaliaq qutsavigaara isumaliutissiissutaa pillugu.

Naalakkersuisut ataatsimiititaliap oqaaseqaatai maluginiarpaat, aamma ataatsimiititaliami amerlanerussuteqartut siunnersuutip itigartinneqarnissaa inassutigigaat.

Naalakkersuisulli ataatsimiititaliap inassuteqaataa isumaqatiginngilaat. Naalakkersuisut naatsumik nassuiaateqarfigissavaat sooq siunnersuut akuersissutigillaqqunartoq.

Piffissami matumani KNI-mit akinut aningaasallu nalinginut qularnaveeqqusiisarnerit ingerlatseqatigiiffik ataatsimut 407,8 mio. kr.-inik annaasaqartissimavaat, pisussaaffiit tamaasa ingerlaannaq piviusunngortinneqassagaluarpata. Tamanna KNI-p ukiumoortumik naatsorsuutaani 31. marts 2016-imeersumi ersippoq.

Annaasaqarneq pissuteqarpoq ingerlatseqatigiiffiup akinut aningaasallu nalinginut qularnaveeqqusiisarluni ingerlatsineranik.

Taamaasilluni qularutissaanngilaq ingerlatseqatigiiffiup akinut aningaasallu nalinginut qularnaveeqqusiisarluni ingerlatsinerata inuiaqatigiit annertuumik aningaasartuuteqartikkai imaluunniit aningaasartuuteqarnerulersissagai.

Aqutsiniarnikkut eqqummaarinnissaq pingaaruteqarluinnarpoq innuttaasut ikummatissanut akissaataat appasinnerpaaffimmiinnissaat qulakkeerneqassappat.

Naalakkersuisut isumaqarput avitsineq imaluunniit taamatut periarfissaqalersitsineq ikummatissaarniarfiup aqunneqarnerata nukittorsarneranik tassungarpiaq kinguneqassasoq, misissuinerup tamanna nalequttuussasoq takutissappagu.

Avitsisinnaanissaq sioqqullugu suut iluaqutaassanersut ajoqutaassanersullu avitsinissamik misissuinerumi qulaajarneqartussaapput.

Naalakkersuisut siunnersuut Inatsisartunut oqaluserisassanngortippaat siunnersuutillu akuersissutigineqarnissaa inassutigalugu.